



LE GOUVERNEMENT
DU GRAND-DUCHÉ DE LUXEMBOURG
Ministère de la Santé

Gemeinsam Äntwert vun der Madamm Gesondheetsministesch an vum Här Premierminister, Staatsminister op d'parlamentaresch Fro n° 7844 vum 30. März 2023 vum honorabelen Deputéierten Här Fernand Kartheiser.

1) Wat sinn zu Lëtzebuerg déi genee Prozeduren, fir en Impfschued ze mellen an eventuell eng Entschiedegung vum Staat ze kréien? Kann all Betreffenen esou eng Prozedur selwer beim Gesondheetsministär ufroen oder muss dat ëmmer iwwer en Dokter goen?

D'Gesetz vum 4. Juli 2000 iwwer d'Verantwortung vum Staat bei Impfungen gesäit vir datt de Staat fir de Schued opkënnert wann eng Impfung, déi duerch eng gesetzlech oder reglementaresch Bestëmmung virgeschriwwen oder vum Staat recommandéiert ass, den Doud vun der geimpfter Persoun verursaacht oder zu enger permanenter kierperlecher Onfäegkeet féiert. D'Verantwortung vum Staat besteet niewent den Aktiounen, déi gemäss dem „droit commun“ ausgeübt kënnen ginn, souwäit de Schued net duerch Leeschtungen vun der sozialer Sécherheet kompenséiert ass.

D'Ufro op Entschiedegung muss bannent enger Period vum 30 Joer no der Impfung schrëftlech per Bréif vun der geimpfter Persoun selwer oder, wann dës mannerjäreg ass, vun den rechtlechen Verrieder beim Gesondheetsministère agereecht ginn. Am Fall vum Doud vun der geimpfter Persoun ass d'Ufro vu hiren lerwen anzerechen.

Folgend Dokumenter mussen der Ufro bäigeluecht ginn:

- e Beweis vun den Impfungen z.B. Impffertifikater,
- medizinesch Bericht, déi den definitiven Kierperschued, deen di geimpften Persoun erlidden huet, beleeën,
- e medizineschen Zertifikat, deen den definitiven Kierperschued oder den Doud als Suite vun der Impfung attestéiert.

Fir ze bewäerten, ob den definitiven Kierperschued oder den Doud vun der geimpfter Persoun op d'Impfung zeréckzuféieren ass, beoptraacht de Gesondheetsministère eng Expertise bei engem medizineschen Expert.

Wann d'Expertise ergëtt, dass di recommandéiert Impfung zu enger permanenter kierperlecher Onfäegkeet bei der geimpfter Persoun gefouert huet oder den Doud vun der geimpfter Persoun verursaacht huet, kritt déi geimpften Persoun oder, wann dës verstuerwen ass, hir lerwen, eng Entschiedegung.

Nëmmen den Doud oder dauerhaft Konsequenzen, déi zu enger permanenter kierperlecher Onfäegkeet, féieren, d.h. déi irreversibel sinn, kennen opgrond vum uewegenannten Gesetz vum 4. Juli 2000 entschiedegt ginn. Üblech Niewewierkungen no enger Impfung wéi z.B. Rötung, Schwellung oder Verhärtung / Härtheit op der Injeksiounsplaz, Kappwéi, Muskelschmerzen, Féiwer, eng temporaire



Onfäegkeet, sinn keng definitiv Schied déi vum Staat op Basis vum Gesetz vum 4. Juli 2000 entschiedegt kënne ginn.

2) Huet d'Regierung vir, z.B. iwwer MyGuichet.lu, fir eng iwwersiichtlech Online- Prozedur ze entwéckelen? Gëtt et um Sitt vum Gesondheetsministär fäerdeg Formulare fir déi Betreffen? Wann nee, firwat net?

De Gesondheetsministère gesäit vir, e Formulaire fir d'Demande op Entschedegung vun Impfschied mat den Informatiounen iwwert d'Prozedur, wéi dës Fäll ënnersicht ginn, auszeschaffen an déi Informatiounen op Santé.lu ze publizéieren.

Fir weider Informatiounen kënnen d'Leit sech och un den Informatiouns- a Mediationsservice am Gesondheetsberäich wenden.

3) Wéi laang brauch de Staat, bis eng Entschedegung decidéiert a bezuelt gëtt? Wéi eng Recours-Méiglechkeeten hu Leit, déi eng negativ Decisioun kruten?

Vun deem Moment un, wou eng Persoun eng Ufro op Entschedegung stellt, ass d'Dauer vun der Prozedur variabel an hängt virun allem dovun of, wéi séier den Dossier mat den néidegen medizineschen an administrativen Dokumenter kompletéiert gëtt, an wéi séier déi néideg Expertisen realiséiert kenne ginn. Dëst hänkt och vun der Disponibilitéit vun den respektiven Expert'en of. Dësweideren müssen d'Kierperschied vun den betreffenen Leit konsolidéiert sinn fir kennen eng permanent kierperlech Onfäegkeet feststellen an den Grad vun dëser kierperlecher Onfäegkeet z'evaluieren.

Wann d'Expertise ergëtt, dass de Schued net duerch d'Impfung entstan ass an d'Verantwortung vum Staat net zeréckbehal gëtt, kennen d'Leit e Recours géint d'Decisioun vum Staat maachen oder op déi üblech Prozeduren aus dem „droit commun“ zeréckgräifen (eventuell Responsabilitéit vum Produzent vun der Impfung oder vum Prestataire deen d'Impfung gemaach huet).

Lëtzebuerg, den 27. Abrëll 2023

D'Gesondheetsministesch
(s.) Paulette Lenert